

Broj: 06-03-416-12/5/15
Mostar, 31.08.2015. godine

Na osnovu člana 21., člana 37., člana 42., člana 84., člana 87. stav (1) i stav (2), člana 88. stav (1) i člana 93. stav (1) i stav (4) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13), člana 20. stav (2) Zakona o korištenju obnovljivih izvora energije i efikasne kogeneracije („Službene novine Federacije BiH“ broj 70/13 i 5/14), člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14), člana 8. stav (1), člana 32. stav (4) i člana 42. stav (1) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12 i 71/14), člana 20. Pravilnika za izdavanje dozvola („Službene novine Federacije BiH“ broj 43/14), člana 10. stav (3) i člana 13. stav (2) Pravilnika o sticanju statusa kvalifikovanog proizvođača električne energije („Službene novine Federacije BiH“ broj 53/14), postupajući po Zahtjevu za izmjenu i dopunu dozvole za rad broj 06-03-416/5/15 od 28.04.2015. godine podnosioca zahtjeva „EBH“ d.o.o. Sarajevo u postupku izmjene i dopune Dozvole za rad - licence za obavljanje elektroprivredne djelatnosti proizvodnje električne energije broj 06-03-1293/84/13 od 22.01.2014. godine, Regulatorna komisija za energiju u Federaciji Bosne i Hercegovine – FERK je dana 31.08.2015. godine na XIV redovnoj sjednici donijela sljedeće

RJEŠENJE

1. Dozvola za rad - licenca za obavljanje elektroprivredne djelatnosti proizvodnje električne energije broj 06-03-1293/84/13 od 22.01.2014. godine izdata Rješenjem broj 06-03-1293-13/84/13 od 22.01.2014. godine, imaocu dozvole „EBH“ d.o.o. Sarajevo mijenja se i dopunjuje, te glasi kao u prilogu, koji je sastavni dio ovog rješenja.
2. Utvrđuje se „EBH“ d.o.o. Sarajevo status kvalifikovanog proizvođača i u objektu mHE „Rujevica-ušće“.
3. Ovo rješenje je konačno i stupa na snagu danom donošenja, te se objavljuje na oglasnoj tabli i internetskoj stranici FERK-a, a dispozitiv ovog rješenja u „Službenim novinama Federacije BiH“.

Obrazloženje

Dana 28.4.2015. godine, FERK je primio od „EBH“ d.o.o. Sarajevo Zahtjev za izmjenu i dopunu dozvole za rad, u postupku izmjene i dopune Dozvole za rad - licence za obavljanje elektroprivredne djelatnosti proizvodnje električne energije broj 06-03-1293/84/13 od 22.01.2014. godine sa novim proizvodnim objektom mHE „Rujevica-ušće“, pod brojem 06-03-416/5/15.

Prilikom pregleda potpunosti podnesenog zahtjeva, u skladu sa članom 9. Pravilnika o javnim raspravama i rješavanju zahtjeva, sporova i žalbi, FERK je utvrdio da podneseni zahtjev nije potpun u smislu člana 12. Pravilnika za izdavanje dozvola. Zbog navedenog,

FERK je postupajući u skladu sa članom 10. Pravilnika o javnim raspravama i rješavanju zahtjeva, sporova i žalbi dostavio podnosiocu zahtjeva Obavještenje o nedostacima podnesenog Zahtjeva za izmjenu i dopunu dozvole za rad broj 06-03-416-01/5/15 od 26.5.2015. godine, te mu odredio rok radi otklanjanja u obavještenju naznačenih nedostataka i upozorio ga na posljedicu propuštanja.

Postupajući po obavještenju, podnosilac zahtjeva je dostavio dopis primljen u FERK 02.06.2015. godine pod brojem 06-03-416-02/5/15, uz koji je dostavio traženu dokumentaciju i obrazloženja.

Postupajući u skladu sa članom 15. Pravilnika za izdavanje dozvola FERK je dana 06.07.2015. godine u „Oslobođenju“ i na svojoj internetskoj stranici objavio Obavještenje za javnost o podnesenom Zahtjevu za izmjenu i dopunu dozvole za rad, u postupku izmjene i dopune Dozvole za rad - licence za obavljanje elektroprivredne djelatnosti proizvodnje električne energije broj 06-03-1293/84/13 od 22.01.2014. godine sa novim proizvodnim objektom mHE „Rujevica-ušće“, podnosioca zahtjeva „EBH“ d.o.o. Sarajevo. Povodom Obavještenja za javnost, FERK do roka naznačenog u obavještenju odnosno do 14.07.2015. godine, nije primio pisane komentare zainteresovanih lica na podneseni zahtjev, niti su podneseni zahtjevi za sticanje statusa umješaća.

Na osnovu navedenog, a u skladu sa članom 55. Pravilnika o javnim raspravama i rješavanju zahtjeva, sporova i žalbi, FERK je dopisom broj 06-03-416-05/5/15 od 14.07.2015. godine obavijestio podnosioca zahtjeva da će FERK provesti postupak izmjene dozvole, bez održavanja formalne rasprave, te istom dao mogućnost da ukoliko raspolaže novim činjenicama u vezi sa predmetom postupka, iste predstavi, odnosno uputi svoje komentare FERK-u do 17.07.2015. godine do 12:00 sati.

Postupajući po navedenoj obavijesti, da se postupak izdavanja dozvole provede po skraćenom postupku, podnosilac zahtjeva je dostavio FERK-u dopis primljen 16.07.2015. godine pod brojem broj 06-03-416-06/5/15, u kojem je naveo da je saglasan da se postupak izmjene dozvole provede po skraćenom postupku i nije iznio nove činjenice u vezi sa predmetom postupka, te nije uputio druge komentare FERK-u.

Na osnovu provedenog postupka tokom kojeg je izvršena pažljiva analiza svih činjenica i podnijetih dokaza na osnovu kojih se moglo utvrditi stanje stvari, FERK je u skladu sa članom 17. stav (2) i stav (3) Pravilnika za izdavanje dozvola, a polazeći od člana 49. stav (1) istog pravilnika kojim je, pored ostalog, propisano da se postupak izmjene i dopune dozvole vodi na isti način kao i postupak izdavanja dozvole, te na osnovu člana 92. stav (1) Zakona o električnoj energiji u Federaciji Bosne i Hercegovine, Odlukom broj 06-03-416-07/5/15 od 23.07.2015. godine usvojio Nacrt dozvole za rad za proizvodnju električne energije, dok je Odlukom broj 06-03-416-08/5/15 od 23.07.2015. godine, ovaj nacrt upućen u proces javne rasprave, te je određeno mjesto, datum i vrijeme održavanja opšte rasprave o predmetnom Nacrtu dozvole, imenovan voditelj postupka i zamjenik voditelja postupka, kao i da zainteresovana lica svoje usmene komentare na Nacrt dozvole za rad za proizvodnju električne energije mogu dati na opštoj raspravi koja je održana 20.08.2015. godine u 13:00 sati, u prostorijama FERK-a u Mostaru, a pisani komentari su se mogli dostaviti na adresu FERK-a ili na elektronsku adresu, u periodu od 24.07.2015. godine do 24.08.2015. godine do 12:00 sati.

Opštoj raspravi o Nacrtu dozvole za rad za proizvodnju električne energije prisustvovao je ovlaštenu predstavnik podnosioca zahtjeva. Podnosilac zahtjeva je istakao da

nema primjedbi i da može da ispuni sve uslove date u predmetnom tekstu Nacrta dozvole za rad za proizvodnju električne energije.

Do ostavljenog roka za dostavu pisanih komentara, odnosno do 24.08.2015. godine do 12:00 sati, u FERK nisu primljeni pisani komentari na Nacrt dozvole za rad za proizvodnju električne energije.

U skladu sa članom 26. stav (2) Pravilnika o javnim raspravama i rješavanju zahtjeva, sporova i žalbi, a na osnovu održane opšte rasprave, voditelj postupka pripremio je pisani izvještaj, koji je sadržavao kratak pregled toka rasprave, zapisnik sa opšte rasprave i preporuke, te je iste uputio podnosiocu zahtjeva na komentare 27.08.2015. godine pod brojem 06-03-416-10/5/15.

Podnosilac zahtjeva je povodom navedenog FERK-u dostavio 28.08.2015. godine dopis primljen u FERK pod brojem 06-03-416-11/5/15, u kojem je naveo da je saglasan sa „Izvještajem voditelja opšte javne rasprave o Nacrtu dozvole za rad za proizvodnju električne energije podnosioca zahtjeva „EBH“ d.o.o. Sarajevo.

Izvještaj voditelja postupka sa komentarima podnosioca zahtjeva dostavljen je članovima FERK-a dana 28.08.2015. godine pod internim brojem 06-08-273/15, na razmatranje radi donošenja odluke.

Na osnovu obrade Zahtjeva za izmjenu i dopunu dozvole za rad podnosioca „EBH“ d.o.o. Sarajevo i dokumentacije priložene uz zahtjev, te analize postupka opšte rasprave, odnosno izvještaja voditelja postupka i komentara podnosioca zahtjeva na izvještaj voditelja postupka, izvršena je izmjena i dopuna Dozvole za rad - licence za obavljanje elektroprivredne djelatnosti proizvodnje električne energije broj 06-03-1293/84/13 od 22.01.2014. godine sa novim proizvodnim objektom mHE „Rujevica-ušće“. Osim navedenog, FERK je uočio i potrebu izmjene i dopune navedene dozvole za rad na osnovu člana 93. stav (2) Zakona o električnoj energiji u Federaciji Bosne i Hercegovine, a sve u javnom interesu. FERK je ocijenio da je opravdano izvršiti određena usklađivanja dozvole za rad sa odredbama Zakona o korištenju obnovljivih izvora energije i efikasne kogeneracije, a takođe i sa odredbama FERK-ovih Pravilnika za izdavanje dozvola i Pravilnika o sticanju statusa kvalifikovanog proizvođača. Kako je predmetna dozvola promijenila naziv u dozvolu za rad za proizvodnju električne energije, kao i zbog potrebe izmjene i dopune više od polovine uslova dozvole za rad, radi preglednosti i lakšeg razumijevanja izmijenjenih i dopunjenih uslova dozvole, te radi ekonomičnosti i efikasnosti postupka izrade, donošenja i objave dozvole za rad, a sve imajući u vidu zahtjev podnosioca i javni interes pristupilo se izradi i usvajanju izmijenjene i dopunjene Dozvole za rad za proizvodnju električne energije imaoca „EBH“ d.o.o. Sarajevo, koja je sastavni dio ovog rješenja. Uvažavajući sve naprijed navedene razloge, predmetna dozvola za rad je izmijenjena i dopunjena u skladu sa zahtjevom podnosioca, te je usklađena sa odredbama naprijed navedenih Zakona o korištenju obnovljivih izvora energije i efikasne kogeneracije, te Pravilnika za izdavanje dozvola i Pravilnika o sticanju statusa kvalifikovanog proizvođača, s tim da je period važenja dozvole za rad ostao nepromijenjen. Postavljeni uslovi stvaraju obavezu „EBH“ d.o.o. Sarajevo da u rokovima propisanim u tim uslovima dozvole za rad za proizvodnju električne energije iste ispuni, u cilju zadovoljenja propisanih kriterija.

Na osnovu navedenog, odlučeno je kao u dispozitivu ovog rješenja.

POUKA O PRAVNOM LIJEKU:

Protiv ovog rješenja podnosilac zahtjeva može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

PREDSJEDNICA FERK-a
Đulizara Hadžimustafić

Dostaviti:

- „EBH“ d.o.o. Sarajevo
- Sektoru za pravne poslove
- Sektoru za tehničke poslove i licence
- Sektoru zajedničkih poslova
- oglasna tabla
- a/a